

四庫全書

史部

欽定四庫全書

史記正義卷三十一

唐 張守節 撰

吳太伯世家第一

史記三十一

吳太伯

吳國號也太伯居梅里在常州無錫縣東南六十里至十九世孫壽夢居之號句吳壽夢卒諸

樊南徙吳至二十一代孫光使子齊築閭閻城都之今蘇州也

太伯弟仲雍皆周太王

之子而王季歷之兄也季歷賢而有聖子昌大王欲立

季歷以及昌於是太伯仲雍二人乃犇荊蠻文身斷髮

示不可用

江熙云太伯少弟季歷生文王昌有聖德太伯知其必有天下故欲傳國於季歷以太王

病託採藥於吳越不反太王薨而季歷立一讓也季歷薨而文王立二讓也文王薨而武王立遂有天下三讓也又釋云太王病而託採藥生不事之以禮一讓也太王薨而不反使季歷主喪不葬之以禮二讓也斷髮文身示不可用使歷主祭祀不祭以禮三讓也 以避季歷季歷果立是為王季

而昌為文王太伯之犇荆蠻自號勾吳荆蠻義之從而歸之千餘家立為吳太伯太伯卒無子弟仲雍立是為吳仲雍仲雍卒子季簡立季簡卒子叔達立叔達卒子周章立是時周武王克殷求太封周章弟虞仲於周之

北故夏虛是為虞仲列為諸侯周章卒子熊遂立熊遂

卒子柯相立

柯音歌相音相匠反

柯相卒子疆鳩夷立疆鳩夷卒

子餘橋疑吾立

橋音橋驕反

餘橋疑吾卒子柯盧立柯盧卒

子周繇立

繇音遙又音由

周繇卒子屈羽立

屈居勿反

屈羽卒子夷

吾立夷吾卒子禽處立禽處卒子轉立轉卒子頗高立

頗高卒子句卑立是時晉獻公滅周北虞公以開晉伐

虢也句卑卒子去齊立去齊卒子壽夢立

夢莫公反

壽夢立

而吳始益大稱王自太伯作吳五世而武王克殷封其

後為二其一虞在中國其一吳在夷蠻十二世而晉

滅中國之虞中國之虞滅二世而夷蠻之吳興

中國之虞滅後

二世合七十一年至
壽夢而興大稱王

大凡從太伯至壽夢十九世王壽

夢二年楚之亡大夫申公巫臣怨楚將子反而犇晉自

晉使吳教吳用兵乘車令其子為吳行人吳於是始通

於中國吳伐楚十六年楚共王伐吳至衡山二十五年

王壽夢卒壽夢有子四人長曰諸樊次曰餘祭次曰餘

昧

祭側界反
昧莫葛反

次曰季札季札賢而壽夢欲立之季札讓不

可於是乃立長子諸樊攝行事當國王諸樊元年諸樊
已除喪讓位季札季札謝曰曹宣公之卒也諸侯與曹
人不義曹君將立子臧子臧去之以成曹君君子曰能
守節矣君義嗣誰敢干君有國非吾節也札雖不材願
附於子臧之義吳人固立季札季札棄其室而耕乃舍
之捨舍音秋吳伐楚楚敗我師四年晉平公初立十三年
王諸樊卒有命授弟餘祭欲傳以次必致國於季札而
止以稱先王壽夢之意且嘉季札之義兄弟皆欲致國

令以漸至焉季札封於延陵故號曰延陵季子王餘祭
三年齊相慶封有罪自齊來奔吳吳予慶封朱方之縣
以為奉邑以女妻之富於在齊四年吳使季札聘於魯
請觀周樂為歌周南召南曰美哉始基之矣猶未也然
勤而不怨歌邶鄘衛曰美哉淵乎憂而不困者也吾聞
衛康叔武公之德如是是其衛風乎歌王曰美哉思而
不懼其周之東乎思音歌鄭曰其細已甚民不堪也是其先
亡乎歌齊曰美哉泱泱乎大風也哉表東海者其太公

乎國未可量也歌豳曰美哉蕩蕩乎樂而不淫其周公
之東乎歌秦曰此之謂夏聲夫能夏則大大之至也其
周之舊乎歌魏曰美哉泂泂乎大而婉儉而易行以德
輔此則盟主也歌唐曰思深哉其有陶唐氏之遺風乎
不然何憂之遠也非令德之後誰能若是歌陳曰國無
主其能久乎自鄘以下無譏焉歌小雅曰美哉思而不
貳怨而不言其周德之衰乎猶有先王之遺民也歌大
雅曰廣哉熙熙乎曲而有直體其文王之德乎歌頌曰

至矣哉直而不倨曲而不詘近而不偏遠而不攜遷而不淫復而不厭哀而不愁樂而不荒用而不匱廣而不宣施而不費取而不貪處而不底行而不流五聲和八風平節有度守有序盛德之所同也見舞象箏南籥者曰美哉猶有憾見舞大武曰美哉周之盛也其若此乎見舞韶護者曰聖人之弘也猶有慚德聖人之難也見舞大夏曰美哉勤而不德非禹其誰能及之見舞招箏曰德至矣哉大矣如天之無不燾也如地之無不載也

雖甚盛德無以加矣觀止矣若有他樂吾不敢觀去魯
遂使齊說晏平仲曰子速納邑與政無邑無政乃免於
難齊國之政將有所歸未得所歸難未息也故晏子因

陳桓子以納政與邑是以免於樂高之難

乃憚反在魯昭公八年樂

施高疆二氏作難陳桓子和之乃解也

去齊使於鄭見子產如舊交謂子

產曰鄭之執政侈難將至矣政必及子子為政慎以禮
不然鄭國將敗去鄭適衛說蘧瑗史狗史鰭公子荆公
叔發公子朝曰衛多君子子未有患也自衛如晉將舍

於宿聞鐘聲曰異哉吾聞之辯而不德必加於戮夫子
獲罪於君以在此懼猶不足而又可以畔乎夫子之在
此猶燕之巢于幕也君在殯而可以樂乎遂去之文子
聞之終身不聽琴瑟適晉說趙文子韓宣子

母本云
名秦 魏

獻子曰晉國其萃於三家乎將去謂叔向曰吾子勉之
君侈而多良大夫皆富政將在三家吾子直必思自免
於難季札之初使北過徐君徐君好季札劍口弗敢言
季札心知之為使上國未獻還至徐徐君已死於是乃

解其寶劍繫之徐君冢樹而去

括地志云徐君廟在泗州徐城縣西南一里即

延陵季子掛劍之徐君也

從者曰徐君已死尚誰予乎季子曰不然

始吾心已許之豈以死倍吾心哉七年楚公子圍弑其王夾敖而代立是為靈王十年楚靈王會諸侯而以伐吳之朱方以誅齊慶封吳亦攻楚取三邑而去十一年楚伐吳至雩婁十二年楚復來伐次於乾谿楚師敗走十七年王餘祭卒弟餘昧立王餘昧二年楚公子弃疾弑其君靈王代立焉四年王餘昧卒欲授弟季札季札

讓逃去於是吳人曰先王有命兄卒弟代立必致季子
季子今逃位則王餘昧後立今卒其子當代乃立王餘
昧之子僚為王王僚二年公子光伐楚敗而亡王舟光
懼襲楚復得王舟而還五年楚之亡臣伍子胥來奔公
子光客之公子光者王諸樊之子也常以為吾父兄弟
四人當傳至季子季子即不受國光父先立即不傳季
子光當立陰納賢士欲以襲王僚八年吳使公子光伐
楚敗楚師迎楚故太子建母於居巢以歸因北伐敗陳

蔡之師九年公子光伐楚拔居巢鍾離初楚邊邑卑梁氏之處女與吳邊邑之女爭桑二女家怒相滅兩國邊

邑長聞之怒而相攻滅吳之邊邑吳王怒故遂伐楚取兩

都而去

兩都即鍾離居巢

伍子胥之初犇吳說吳王僚以伐楚

之利公子光曰胥之父兄為僇於楚欲自報其仇耳未

見其利於是伍員知光有他志乃求勇士專諸

吳越春秋云專

諸豐邑人伍子胥初亡楚如吳時遇之於途專諸方與人闘甚不可當其妻呼還子胥恠而問其狀專諸曰夫屈一人之下必申萬人之上胥因而見之光喜乃客伍相之雄貌深目侈口熊背知其勇士

子胥子胥退而耕於野以待專諸之事十二年冬楚平王卒十三年春吳欲因楚罋而伐之使公子蓋餘燭庸以兵圍楚之六灣使季札於晉以觀諸侯之變楚發兵絕吳兵後吳兵不得還於是吳公子光曰此時不可失也告專諸曰不索何獲我真王嗣當立吾欲求之季子雖至不吾廢也專諸曰王僚可殺也母老子弱而兩公子將兵攻楚楚絕其路方今吳外困於楚而內空無骨鯁之臣是無奈我何光曰我身子之身也四月丙子光伏

甲士於窟室而謁王僚飲王僚使兵陳於道自王宮至
光之家門階戶席皆王僚之親也人夾持鉞公子光詳
為足疾入于窟室使專諸置匕首於炙魚之中以進食
手匕首刺王僚鉞交於匈遂弑王僚公子光竟立為王
是為吳王闔廬闔廬乃以專諸子為卿季子至曰苟先
君無廢祀民人無廢主社稷有奉乃吾君也吾敢誰怨
乎哀死事生以待天命非我生亂立者從之先人之道
也復命哭僚墓

復音狀
下同

復位而待吳公子燭庸蓋餘二

人將兵遇圍於楚者聞公子光弒王僚自立乃以其兵
降楚楚封之於舒王闔廬元年舉伍子胥為行人而與
謀國事楚誅伯州犂其孫伯嚭亡奔吳吳以為大夫三
年吳王闔廬與子胥伯嚭將兵伐楚拔舒殺吳亡將二
公子光謀欲入郢將軍孫武曰民勞未可待之四年伐
楚取六與濞五年伐越敗之六年楚使子常囊瓦伐吳

左傳

云楚囊瓦為令尹杜預云囊之孫子常

迎而擊之大敗楚軍於豫章取楚

之居巢而還九年吳王闔廬謂伍子胥孫武曰始子之

言郢未可入今果如何二子對曰楚將子常貪而唐蔡皆怨之王必欲大伐必得唐蔡乃可闔廬從之悉興師

與唐蔡西伐楚至於漢水楚亦發兵拒吳夾水陳

音陣

吳

王闔廬弟夫槩

音古
代反

欲戰闔廬弗許夫槩曰王已屬臣

兵兵以利為上尚何待焉遂以其部五千人襲冒楚楚

兵大敗走於是吳王遂縱兵追之比至郢五戰楚五敗

楚昭王亡出郢奔鄖鄖公弟

左傳云鄖公
辛之弟璆也

欲弑昭王昭

王與鄖公犇隨而吳兵遂入郢子胥伯嚭鞭平王之尸

以報父讎十年春越聞吳王之在郢國空乃伐吳吳使
別兵擊越楚告急秦秦遣兵救楚擊吳吳師敗闔廬弟
夫槩見秦越交敗吳吳王留楚不去夫槩亡歸吳而自
立為吳王闔廬聞之乃引兵歸攻夫槩夫槩敗奔楚楚
昭王乃得以九月復入郢而封夫槩於堂谿為堂谿氏

括地志云豫州吳房縣在州西北九十里應劭云吳王
闔廬弟夫槩奔楚封之於堂谿氏本房子國以封吳故

曰吳房

十一年吳王使太子夫差伐楚取番楚恐而去郢

徙都十五年孔子相魯十九年夏吳伐越越王句踐迎

擊之檣李越使死士挑戰

挑音田鳥反

三行造吳師呼自剄

行故卽反造千到反呼火故反剄堅鼎反

吳師觀之越因伐吳敗之姑蘇傷

吳王闔廬指軍却七里吳王病傷而死闔廬使立太子

夫差謂曰爾而忘句踐殺汝父乎對曰不敢三年乃報

越王夫差元年以大夫伯嚭為太宰習戰射常以報越

為志二年吳王悉精兵以伐越敗之夫椒報姑蘇也越

王句踐乃以甲兵五千人棲於會稽使大夫種因吳太

宰嚭而行成

國語云越飾美女八人納太宰嚭曰子苟然放越之罪

請委國為臣

妻吳王將許之伍子胥諫曰昔有過氏殺斟灌以伐斟
尋滅夏后帝相帝相之妃后緡方娠逃於有仍而生少
康少康為有仍牧正有過又欲殺少康少康奔有虞有
虞思夏德於是妻之以二女而邑之於綸有田一成有
衆一旅後遂收夏衆撫其官職使人誘之遂滅有過氏
復禹之績祀夏配天不失舊物今吳不如有過之疆而
句踐大於少康今不因此而滅之又將寬之不亦難乎
且句踐為人能辛苦今不滅後必悔之吳王不聽聽太

宰嚭卒許越平與盟而罷兵去七年吳王夫差聞齊景公死而大臣爭寵新君弱乃興師北伐齊子胥諫曰越王句踐食不重味衣不重采弔死問疾且欲有所用其衆此人不死必為吳患今越在腹心疾而王不先而務齊不亦謬乎吳王不聽遂北伐齊敗齊師於艾陵至繒召魯哀公而徵百牢季康子使子貢以周禮說太宰嚭乃得止因留畧地於齊魯之南九年為騶伐魯至與魯盟乃去十年因伐齊而歸十一年復北伐齊越王句踐

率其衆以朝吳厚獻遺之吳王喜唯子胥懼曰是棄吳也諫曰越在腹心今得志於齊猶石田無所用且盤庚之誥有顛越勿遺商之以興吳王不聽使子胥於齊子胥屬其子於齊鮑氏還報吳王吳王聞之大怒賜子胥屬鏹之劍以死

屬音燭鏹音力于反

將死曰樹吾墓上以梓令可

為罷抉吾眼置之吳東門以觀越之滅吳也

吳俗傳云子胥亡後

越從松江開渠至橫山東北築城伐吳子胥乃與越軍夢令從東南入破吳越王即移向三江口岸立壇殺白馬祭子胥杯動酒盡越乃開渠子胥作溝壘羅城東開入滅吳至今猶號曰示浦門曰鱖鱖是從東門入滅

也吳齊鮑氏弑齊悼公吳王聞之哭於軍門外三日乃從

海上攻齊齊人敗吳吳王乃引兵歸十三年吳召魯衛
之君會於橐臯十四年春吳王北會諸侯於黃池欲霸
中國以全周室六月戊子越王句踐伐吳乙酉越五千
人與吳戰丙戌虜吳太子友丁亥入吳吳人告敗於王
夫差夫差惡其聞也或泄其語吳王怒斬七人於幕下
七月辛丑吳王與晉定公爭長吳王曰於周室我為長
晉定公曰於姬姓我為伯趙鞅怒將伐吳乃長晉定公

吳王已盟與晉別欲伐宋太宰嚭曰可勝而不能居也
乃引兵歸國國亡太子內空王居外久士皆罷敝於是
乃使厚幣以與越平十五年齊田常殺簡公十八年越
益彊越王句踐率兵使伐敗吳師於笠澤楚滅陳二十
年越王句踐復伐吳二十一年遂圍吳二十三年十一
月丁卯越敗吳越王句踐欲遷吳王夫差於甬東予百
家居之吳王曰孤老矣不能事君王也吾悔不用子胥
之言自令陷此遂自剄死越王滅吳誅太宰嚭以為不

忠而歸

太史公曰孔子言太伯可謂至德矣三以天下讓民無
得而稱焉余讀春秋古文乃知中國之虞與荆蠻勾吳
兄弟也延陵季子之仁心慕義無窮見微而知清濁嗚
呼又何其閱覽博物君子也

史記正義卷三十一

欽定四庫全書

史記正義卷三十二

唐 張守節 撰

齊太公世家第二

括地志云天齊池在青州臨淄縣東南十五里封禪書云齊之所以為齊

者以天齊

史記三十二

太公望呂尚者東海上人其先祖嘗為四嶽佐禹平水土甚有功虞夏之際封於呂或封於申姓姜氏夏商之時申呂或封枝庶子孫或為庶人尚其後苗裔也本姓

姜氏從其封姓故曰呂尚呂尚蓋嘗窮困年老矣以漁

釣奸周西伯

奸音干括地志云茲泉水源出岐州岐山縣西南凡谷呂氏春秋云太公釣於茲泉

遇文王鄭元云磻磻中有泉謂之茲泉積水為陣即太公釣處今謂之凡谷有石壁深高幽邃人跡罕及東南

隅有石室蓋太公所居水次盤石釣處即太公垂釣之所其投竿跪餌兩膝遺跡猶存是磻磻之稱也其水清

冷神異北流十二里注于渭說苑云呂望年七十釣于渭渚三日三夜魚無食者望即忽脫其衣冠上有農人

者告之異人謂望曰子姑復釣必細其綸芳其餌徐徐而投無令魚駭望如其言初下得鮒次得鯉刺魚腹得

書書文曰呂望封於齊望知其異

西伯將出獵卜之曰所獲非龍非麇

非虎非羆所獲霸王之輔於是周西伯獵果遇太公於

渭之陽與語大說曰自吾先君太公曰當有聖人適周
周以興子真是邪吾太公望子久矣故號之曰太公望
載與俱歸立為師或曰太公博聞嘗事紂紂無道去之
游說諸侯無所遇而卒西歸周西伯或曰呂尚處士隱
海濱周西伯拘羑里散宜生閔夭素知而招呂尚呂尚
亦曰吾聞西伯賢又善養老盍往焉三人者為西伯求
美女奇物獻之於紂以贖西伯西伯得以出反國言呂
尚所以事周雖異然要之為文武師周西伯昌之脫羑

里歸與呂尚陰謀修德以傾商政其事多兵權與奇計

六韜云武王問太公曰律之音聲可以知三軍之消息乎太公曰深哉王之問也夫律管十二其要有五宮商角徵羽此其正聲也萬代不易五行之神道之常也可以知敵金木水火土各以其勝攻之其法以天清靜無陰雲風雨夜半遣輕騎往至敵人之壘九伯步偏持律管橫耳大呼驚之有聲應管其來甚微角管齊應當以白虎徵管聲應當以玄武商管聲應當以勾陳五管盡不應無有商聲當以青龍此五行之府佐勝之徵陰敗之機也

故後世之言兵及周之陰權皆宗太公為本謀周

西伯政平及斷虞芮之訟而詩人稱西伯受命曰文王

伐崇密須夷大作豐邑天下三分其二歸周者太公

之謀計居多文王崩武王即位九年欲脩文王業東伐以觀諸侯集否師行師尚父左杖黃鉞右把白旄以誓曰蒼兕蒼兕摠爾衆庶與爾舟楫後至者斬遂至盟津諸侯不期而會者八百諸侯諸侯皆曰紂可伐也武王曰未可還師與太公作此大誓居二年紂殺王子比干囚箕子武王將伐紂卜龜兆不吉風雨暴至羣公盡懼唯太公彊之勸武王武王於是遂行十一年正月甲子誓於牧野伐商紂紂師敗績紂反走登鹿臺遂追斬紂

明日武王立于社羣公奉明水衛康叔封布采席師尚父牽牲史佚策祝以告神討紂之罪散鹿臺之錢發鉅橋之粟以振貧民封比干墓釋箕子囚遷九鼎修周政與天下更始師尚父謀居多於是武王已平商而王天下封師尚父於齊營丘

括地志云營丘在青州臨淄北百步外城中

東就

國道宿行遲逆旅之人曰吾聞時難得而易失客寢甚安殆非就國者也太公聞之夜衣而行犁明至國萊侯來伐與之爭營丘營丘邊萊萊人夷也會紂之亂而周

初定未能集遠方是以與太公爭國太公至國修政因其俗簡其禮通商工之業便魚鹽之利而人民多歸齊

齊為大國及周成王少時管蔡作亂淮夷

孔安國云淮浦之夷徐州

之畔周乃使召康公命太公曰東至海西至河南至穆

陵北至無棣五侯九伯實得征之齊由此得征伐為大

國都營丘蓋太公之卒百有餘年子丁公呂伋

謚法述義不克

丁曰立丁公卒子乙公得立乙公卒子癸公慈母立癸公

卒子哀公不辰立哀公時紀侯譖之周周烹哀公而立

其弟靜是為胡公

謚法彌年壽考曰胡

胡公徙都薄姑

括地志云薄姑城在

青州博昌縣東北六十里

而當周夷王之時哀公之同母少弟山怨

胡公乃與其黨率營丘人襲攻殺胡公而自立是為獻

公獻公元年盡逐胡公子因徙薄姑都治臨菑九年獻

公卒子武公壽立武公九年周厲王出奔居彘

直厲反括地志

云晉州霍邑縣也鄭元云霍山在彘本秦時霍伯國

十年王室亂大臣行政號曰

共和二十四年周宣王初立二十六年武公卒子厲公

無忌立厲公暴虐故胡公子復入齊齊人欲立之乃與

攻殺厲公胡公子亦戰死齊人乃立厲公子赤為君是為
文公而誅殺厲公者七十人文公十二年卒子成公脫立
成公九年卒子莊公購立莊公二十四年犬戎殺幽王周東
徙雒秦始列為諸侯五十六年晉弑其君昭侯六十四年莊
公卒子釐公祿甫立釐公九年魯隱公初立十九年魯桓
公弑其兄隱公而自立為君二十五年北戎伐齊鄭使太
子忽來救齊齊欲妻之忽曰鄭小齊大非我敵遂辭之
三十二年釐公同母弟夷仲年死其子曰公孫無知釐公愛

之令其秩服奉養比太子三十三年釐公卒太子諸兒
立是為襄公襄公元年始為太子時嘗與無知闕及立
絀無知秩服無知怨四年魯桓公與夫人如齊齊襄公
故嘗私通魯夫人魯夫人者襄公女弟也自釐公時嫁
為魯桓公婦及桓公來而襄公復通焉魯桓公知之怒
夫人夫人以告齊襄公齊襄公與魯君飲醉之使力士
彭生抱上魯君車因拉殺魯桓公

拉音力
合反

桓公下車則

死矣魯人以為讓而齊襄公殺彭生以謝魯八年伐紀

紀遷去其邑十二年初襄公使連稱管至父戍葵丘瓜
時而往及瓜而代往戍一歲卒瓜時而公弗為發代或
為請代公弗許故此二人怒因公孫無知謀作亂連稱
有從妹在公宮無寵使之間襄公曰事成以女為無知
夫人冬十二月襄公游姑棼音扶遂獵沛丘左傳云齊襄公田于
貝邱墜車傷足即此也見彘從者曰彭生公怒射之彘人立而啼

公懼墜車傷足失屨反而鞭主屨者第三百第

非佛反下同第

主履者也

出宮而無知連稱管至父等聞公傷乃遂率其衆

襲宮逢主屨裼裼曰且無入驚宮驚宮未易入也無知

弗信裼示之創

音瘡

乃信之待宮外令裼先入裼先入即

匿襄公戶間良久無知等恐遂入宮裼反與宮中及公
之幸臣攻無知等不勝皆死無知入宮求公不得或見
人足於戶間發視乃襄公遂弑之而無知自立為齊君
桓公元年春齊君無知游於雍林雍林人嘗有怨無知
及其往游雍林人襲殺無知告齊大夫曰無知弑襄公
自立臣謹行誅唯大夫更立公子之當立者唯命是聽

初襄公之醉殺魯桓公通其夫人殺誅數不當淫於婦
人數欺大臣羣弟恐禍及故次弟糾奔魯其母魯女也
管仲召忽傅之次弟小白奔莒鮑叔傅之小白母衛女
也有寵於釐公小白自少好善大夫高傒傒音奚及雍林
人殺無知議立君高國先陰召小白於莒魯聞無知死
亦發兵送公子糾而使管仲別將兵遮莒道射中小白
帶鉤小白佯死管仲使人馳報魯魯送糾者行益遲伐
魯至齊則小白已入高傒立之是為桓公桓公之中鉤

佯死以誤管仲已而載溫車中馳行亦有高國內應故
得先入立發兵距魯秋與魯戰于乾時魯兵敗走齊兵
掩絕魯歸道齊遺魯書曰子糾兄弟弗忍誅請魯自殺
之召忽管仲讎也請得而甘心醢之不然將圍魯魯人
患之遂殺子糾于笙瀆召忽自殺管仲請囚桓公之立
發兵攻魯心欲殺管仲鮑叔牙曰臣幸得從君君竟以
立君之尊臣無以增君君將治齊即高傒與叔牙足也
君且欲霸王非管夷吾不可夷吾所居國國重不可失

也於是桓公從之乃詳為召管仲欲甘心實欲用之管仲知之故請往鮑叔牙迎受管仲及堂阜而脫桎梏齋祓而見桓公桓公厚禮以為大夫任政桓公既得管仲與鮑叔隰朋高傒修齊國政連五家之兵設輕重魚鹽之利以贍貧窮祿賢能齊人皆說二年伐滅郟郟子奔莒初桓公亡時過郟郟無禮故伐之五年伐魯魯將師敗魯莊公請獻遂邑以平桓公許與魯會柯而盟魯將盟曹沫以匕首劫桓公於壇上曰反魯之侵地桓公許

之已而曹沫去已首北面就臣位桓公後悔欲無與魯地而殺曹沫管仲曰夫劫許之而倍信殺之愈一小快耳而棄信於諸侯失天下之援不可於是遂與曹沫三敗所亡地於魯諸侯聞之皆信齊而欲附焉七年諸侯會桓公於甄而桓公於是始霸焉十四年陳厲公子完桓音號敬仲來奔齊齊桓公欲以為卿讓於是以為工正田成子常之祖也二十三年山戎伐燕燕告急於齊齊桓公救燕遂伐山戎至于孤竹而還燕莊公遂送桓公

入齊境桓公曰非天子諸侯相送不出境吾不可以無禮於燕於是分溝割燕君所至與燕命燕君復修召公之政納貢于周如成康之時諸侯聞之皆從齊二十七年魯湣公母曰哀姜桓公女弟也哀姜淫於魯公子慶父慶父弑湣公哀姜欲立慶父魯人更立釐公桓公名哀姜殺之二十八年衛文公有狄亂告急於齊齊率諸侯城楚邱而立衛君二十九年桓公與夫人蔡姬戲船中蔡姬習水蕩公公懼止之不止出船怒歸蔡姬弗絕

蔡亦怒嫁其女桓公聞而怒興師往伐三十年春齊桓公率諸侯伐蔡蔡潰遂伐楚楚成王興師問曰何故涉吾地管仲對曰昔召康公命我先君太公曰五侯九伯若實征之以夾輔周室賜我先君履東至海西至河南至穆陵北至無棣楚貢包茅不入王祭不具是以來責昭王南征不復是以來問楚王曰貢之不入有之寡人罪也敢不共乎昭王之出不復君其問之水濱齊師進次于陘夏楚王使屈完將兵扞齊齊師退次召陵桓公

矜屈完以其衆屈完曰君以道則可若不則楚方城以
為城江漢以為溝君安能進乎乃與屈完盟而去過陳
陳袁濤塗詐齊令出東方覺秋齊伐陳是歲晉殺太子
申生三十五年夏會諸侯于葵邱周襄王使宰孔賜桓
公文武胙彤弓矢大路命無拜桓公欲許之管仲曰不
可乃下拜受賜秋復會諸侯於葵邱益有驕色周使宰
孔會諸侯頗有叛者晉侯病後遇宰孔宰孔曰齊侯驕
矣弟無行從之是歲晉獻公卒里克殺奚齊卓子
卓丑
角反

秦穆公以夫人入公子夷吾為晉君桓公於是討晉亂
至高梁使隰朋立晉君還是時周室微唯齊楚秦晉為
彊晉初與會

與音預
下同

獻公死國內亂秦穆公辟遠不與

中國會盟楚成王初收荊蠻有之夷狄自置唯獨齊為
中國會盟而桓公能宣其德故諸侯賓會於是桓公稱

曰寡人南伐至召陵望熊山北伐山戎離枝孤竹西伐

大夏涉流沙

大夏并州
晉陽是也

東馬懸車登太行至卑耳山

卑音

辟劉伯莊及
韋昭並如字

而還諸侯莫違寡人寡人兵車之會三

左傳

云魯莊十三年會北杏以平宋亂僖四年侵蔡遂伐楚六年伐鄭圍新城也

乘車之會六

左傳

云魯莊十四年會于鄆十五年又會鄆十六年同盟于幽陵五年會首止八年盟于洮九年會葵邱是也

九

合諸侯一匡天下

匡正也一匡天下謂定襄王為太子之位也

昔三代受命

有何以異於此乎吾欲封泰山禪梁父管仲固諫不聽

乃說桓公以遠方珍物至乃得封桓公乃止三十八

年周襄王弟帶與戎翟合謀伐周齊使管仲平戎於周

周欲以上卿禮管仲管仲頓首曰臣倍臣安敢三讓乃

受下卿禮以見三十九年周襄王弟帶來奔齊齊使仲

孫請王為帶謝襄王怒弗聽四十一年秦穆公虜晉惠

公復歸之是歲管仲隰朋皆卒

括地志云管仲家在青州臨淄縣南二十一里

牛山上與桓公冢連隰朋墓在青州臨淄縣東北七里也

管仲病桓公問曰羣臣誰

可相者管仲曰知臣莫如君公曰易牙如何

即雍巫也賈逵云雍

巫雍人名
巫易牙也

對曰殺子以適君非人情不可公曰開方如

何

管子云衛公子開方去其千乘之太子而臣事君也

對曰倍親以適君非人情

難近公曰豎刁如何

刁為條反顏師古云豎刁易牙皆齊桓公臣管仲有病桓公往問之

曰將何以教寡人管仲曰願君遠易牙豎刁公曰易牙烹其子以快寡人尚可疑耶對曰人之情非不愛其子

也其子之忍又將何愛於君公曰豎刁自宮以近寡人猶尚疑耶對曰人之情非不愛其身也其身之忍又將何有於君公曰諾管仲遂盡逐之而公食不甘心不怡者三年公曰仲父不已過乎於是皆即召反明年公有病易牙豎刁相與作亂塞宮門築高牆不通人有一婦人踰垣入至公所公曰我欲食婦人曰吾無所得又曰我欲飲婦人曰吾無所得公曰何故曰易牙豎刁相與作亂塞宮門築高牆不通人故無所得公慨然歎涕出曰嗟乎聖人所見豈不遠哉若死者有知我將何面目見仲父乎蒙衣袂而死乎壽宮蟲流於戶蓋以楊門之扇二月

不葬也

對曰自宮以適君非人情難親管仲死而桓公

不用管仲言卒近用三子三子專權四十二年戎伐周周告急齊齊令諸侯各發卒戍周是歲晉公子重耳來

桓公妻之四十三年初齊桓公之夫人三曰王姬徐姬
蔡姬皆無子桓公好內多內寵如夫人者六人長衛姬
生無詭少衛姬生惠公元鄭姬生孝公昭葛嬴生昭公
潘密姬生懿公商人宋華子生公子雍桓公與管仲屬
孝公於宋襄公以為太子雍巫有寵於衛共姬因宦者
豎刁以厚獻於桓公亦有寵桓公許之立無詭管仲卒
五公子皆求立冬十月乙亥齊桓公卒易牙入與豎刁
因內寵殺羣吏而立公子無詭為君太子昭奔宋桓公

病五公子各樹黨爭立及桓公卒遂相攻以故宮中空

莫敢棺

音古
患反

桓公尸在牀上六十七日尸蟲出於戶十

二月乙亥無詭立乃棺赴辛巳夜歛殯桓公十有餘子
要其後立者五人無詭立三月死無謚次孝公次昭公
次懿公次惠公孝公元年三月宋襄公率諸侯兵送齊
太子昭而伐齊齊人恐殺其君無詭齊人將立太子昭
四公子之徒攻太子太子走宋宋遂與齊人四公子戰
五月宋敗齊四公子師而立太子昭是為齊孝公宋以

桓公與管仲屬之太子故來征之以亂故八月乃葬齊

桓公

括地志云齊桓公墓在臨菑縣南二十一里牛山上亦名鬲足山一名牛首崗一所二墳晉永嘉末

人發之初得版次得水銀池有氣不得入經數日乃牽犬入中得金蠶數十薄珠襦玉匣繒絲軍器不可勝數

又以人殉葬骸骨狼藉也六年春齊伐宋以其不同盟于齊也夏宋

襄公卒七年晉文公立十年孝公卒孝公弟潘因衛公

子開方殺孝公子而立潘是為昭公昭公桓公子也其

母曰葛嬴昭公元年晉文公敗楚於城濮賈逵云衛地也而會

諸侯踐土朝周天子使晉稱伯音霸六年翟侵齊晉文

公卒秦兵敗於穀十二年秦穆公卒十九年五月昭公卒子舍立為齊君舍之母無寵於昭公國人莫畏昭公之弟商人以桓公死爭立而不得陰交賢士附愛百姓百姓說及昭公卒子舍立孤弱即與衆十月即墓上弑齊君舍而商人自立是為懿公懿公桓公子也其母曰

密姬懿公四年春初懿公為公子時與丙戎之父獵爭

獲不勝及即位斷丙戎父足而使丙戎僕

左傳云乃掘而刑之杜預

云斷其尸足也

庸職之妻

國語及左傳作閭職

好公內之宮使庸職驂乘

五月懿公游於申池二人浴戲職曰斷足子戎曰奪妻者二人俱病此言乃怨謀與公游竹中二人弑懿公車上棄竹中而亡去懿公之立驕民不附齊人廢其子而迎公子元於衛立之是為惠公惠公桓公子也其母衛女曰少衛姬避齊亂故在衛惠公二年長翟來王子城父攻殺之埋之於北門晉趙穿弑其君靈公十年惠公卒子頃公無野立

頃音頃

初崔杼有寵於惠公惠公卒高

國畏其偪也逐之崔杼奔衛頃公元年楚莊王彊伐陳

二年圍鄭鄭伯降已復國鄭伯六年春晉使卻克於齊
齊使夫人帷中而觀之卻克上夫人笑之卻克曰不是
報不復涉河歸請伐齊晉侯弗許齊使至晉卻克執齊
使者四人河內殺之八年晉伐齊齊以公子疆質晉晉
兵去十年春齊伐魯衛魯衛大夫如晉請師皆因卻克
晉使卻克以車八百乘為中軍將士燮將上軍欒書將
下軍以救魯衛伐齊六月壬申與齊侯兵合靡笄下癸
酉陳于鞌逢丑父為齊頃公右頃公曰馳之破晉軍會

食射傷卻克流血至履克欲還入壁其御曰我始入再傷不敢言疾恐懼士卒願子忍之遂復戰戰齊急丑父恐齊侯得乃易處頃公為右車絰於木而止

絰胡封反止也有所

礙也

晉小將韓厥伏齊侯車前曰寡君使臣救魯衛戲之

丑父使頃公下取飲

左傳云及華泉驂絰於木而止丑父使公下如華泉取飲周父御左

車跪後為右載齊侯獲免也

因得亡脫去入其軍晉卻克欲殺丑父

丑父曰代君死而見僇後人臣無忠其君者矣克舍之

丑父遂得亡歸齊於是晉軍追齊至馬陵齊侯請以寶

罷謝不聽必得笑克者蕭桐叔子令齊東畝對曰叔子齊君母齊君母亦猶晉君母子安置之且子以義伐而以暴為後其可乎於是乃許令反魯衛之侵地

左傳云晉師及

齊國使齊人歸我汶陽之田也

十一年晉初置六卿賞鞏之功齊頃公

朝晉欲尊王晉景公晉景公不敢受乃歸歸而頃公弛苑囿薄賦斂振孤問疾虛積聚以救民民亦大說厚禮諸侯竟頃公卒百姓附諸侯不犯十七年頃公卒子靈公環立靈公九年晉欒書弑其君厲公十年晉悼公伐

齊齊令公子光質晉十九年立子光為太子高厚傅之

令會諸侯盟於鐘離

括地志云鐘離故城在沂州承縣界

二十七年晉使

中行獻子伐齊齊師敗靈公走入臨菑晏嬰止靈公靈

公弗從曰君亦無勇矣晉兵遂圍臨菑臨菑城守不敢

出晉焚郭中而去二十八年初靈公取魯女生子光以

為太子仲姬戎姬戎姬嬖仲姬生子牙屬之戎姬戎姬

請以為太子公許之仲姬曰不可光之立列於諸侯矣

今無故廢之君必悔之公曰在我耳遂東太子光使高

厚傅牙為太子靈公疾崔杼迎故太子光而立之是為莊公莊公殺戎姬五月壬辰靈公卒莊公即位執太子牙於勾竇之邱殺之八月崔杼殺高厚晉聞齊亂伐齊至高唐莊公三年晉大夫欒盈奔齊莊公厚客待之晏嬰田文子諫公弗聽四年齊莊公使欒盈間入晉曲沃為內應以兵隨之上太行入孟門欒盈敗齊兵還取朝歌六年初棠公妻好棠公死崔杼取之莊公通之數如崔氏以崔杼之冠賜人侍者曰不可崔杼怒因其伐晉

欲與晉合謀襲齊而不得聞莊公嘗答宦者賈舉賈舉

復侍為崔杼間公

間音閑
又如字

以報怨五月莒子朝齊齊以

甲戌饗之崔杼稱病不視事乙亥公問崔杼病遂從崔

杼妻崔杼妻入室與崔杼自閉戶不出公擁柱而歌宦

者賈舉遮公從宮而入閉門崔杼之徒持兵從中起公

登臺而請解不許請盟不許請自殺於廟不許皆曰君

之臣杼疾病不能聽命近於公宮陪臣爭趣有淫者不

知二命公踰牆射中公股公反墜遂弑之晏嬰立崔杼

門外曰君為社稷死則死之為社稷亡則亡之若為已死已亡非其私暱誰敢任之門開而入枕公尸而哭三踊而出人謂崔杼必殺之崔杼曰民之望也舍之得民丁丑崔杼立莊公異母弟杵臼是為景公景公母魯叔孫宣伯女也景公立以崔杼為右相慶封為左相二相恐亂起乃與國人盟曰不與崔慶者死晏子仰天曰嬰所不獲唯忠於君利社稷者是從不肯盟慶封欲殺晏子崔杼曰忠臣也舍之齊太史書曰崔杼弑莊公崔杼

殺之其弟復書崔杼復殺之少弟復書崔杼乃舍之景

公元年初崔杼生子成及彊其母死取東郭女生明東

郭女使其前夫子無咎與其弟偃杜預云東郭偃東郭姜之弟也相崔

氏成有罪左傳云成有疾而廢之杜預云有惡疾也二相急治之立明為太

子成請老於崔杼崔杼許之二相弗聽曰崔宗邑不可

成彊怒告慶封左傳云成彊告慶封曰夫子身亦子所知也唯無咎與偃是從父兄莫能進矣

恐害夫子敢以告慶封曰苟利夫子必去之難吾助汝乃殺東郭偃堂無咎於崔氏朝也其妻及崔杼皆縊死

崔明慶封與崔杼有郤欲其敗也成彊殺無咎偃於崔

齊魯

杼家皆奔亡崔杼怒無人使一宦者御見慶封慶封
曰請為子誅之使崔杼仇盧蒲嬖攻崔氏殺成彊盡滅
崔氏崔氏婦自殺崔杼歸亦自殺慶封為相國專權三
年十月慶封出獵初慶封已殺崔杼益驕嗜酒好獵不
聽政令慶舍用政已有內卻田文子謂桓子曰亂將作
田鮑高欒氏相與謀慶氏慶舍發甲圍慶封宮四家徒
共擊破之慶封還不得入奔魯齊人讓魯封奔吳吳與
之朱方聚其族而居之富於在齊其秋齊人徙葬莊公

僂崔杼尸於市以說衆九年景公使晏嬰之晉與叔向
私語曰齊政卒歸田氏田氏雖無大德以公權私有德
於民民愛之十二年景公如晉見平公欲與伐燕十八
年公復如晉見昭公二十六年獵魯郊因入魯與晏嬰
俱問魯禮三十一年魯昭公辟季氏難奔齊齊欲以干
社封之子家止昭公昭公乃請齊伐魯取鄆鄆鄆城也以居
昭公三十二年彗星見景公坐栢寢嘆曰堂堂誰有此
乎羣臣皆泣晏子笑公怒晏子曰臣笑羣臣諛甚景公

曰彗星出東北當齊分野寡人以為憂晏子曰君高臺

深池賦歛如弗得刑罰恐弗勝彗星將出彗星

彗音佩
謂客星

侵犯近邊側欲相害又曰彗息
歲反若彗形見其境有亂也

何懼乎公曰可禳否晏子

曰使神可祝而來

祝音章
受反

亦可禳而去也百姓苦怨以

萬數而君令一人禳之安能勝衆口乎是時景公好治

宮室聚狗馬奢侈厚賦重刑故晏子以此諫之四十二

年吳王闔閭伐楚入郢四十七年魯陽虎攻其君不勝

奔齊請齊伐魯鮑子諫景公乃囚陽虎陽虎得亡奔晉

四十八年與魯定公好會夾谷犁鉏曰孔丘知禮而怯請令萊人為樂因執魯君可得志景公害孔丘相魯懼其霸故從犁鉏之計方會進萊樂孔子歷階上使有司執萊人斬之以禮讓景公景公慚乃歸魯侵地以謝而罷去是歲晏嬰卒五十五年范中行反其君於晉晉攻之急來請粟田乞欲為亂樹黨於逆臣說景公曰范中行數有德於齊不可不救乃使乞救而輸之粟五十八年夏景公夫人燕姬適子死景公寵妾芮姬生子荼荼

少其母賤無行諸大夫恐其為嗣乃言願擇諸子長賢者為太子景公老惡言嗣事又愛荼母欲立之憚發之口乃謂諸大夫曰為樂耳國何患無君乎秋景公病命國惠子高昭子立少子荼為太子逐羣公子遷之萊景公卒太子荼立是為晏孺子冬未葬而羣公子畏誅皆出亡荼諸異母兄公子壽駒黔奔衛三公公子馭陽生奔魯萊人歌之曰景公死乎弗與埋三軍事乎弗與謀師乎師乎胡黨之乎晏孺子元年春田乞偽事高國者

每朝乞驂乘言曰子得君大夫皆自危欲謀作亂又謂諸大夫曰高昭子可畏及未發先之大夫從之六月田乞鮑牧乃與大夫以兵入公宮攻高昭子昭子聞之與國惠子救公公師敗田乞之徒追之國惠子奔莒遂反殺高昭子晏圉奔魯八月齊秉意茲田乞敗二相乃使人之魯召公子陽生陽生至齊私匿田乞家十月戊子田乞請諸大夫曰常之母有魚菽之祭幸來會飲會飲田乞盛陽生橐中置坐中央發橐出陽生曰此乃齊君

矣大夫皆伏謁將與大夫盟而立之鮑牧醉乞誣大夫
曰吾與鮑牧謀共立陽生鮑牧怒曰子忘景公之命乎
諸大夫相視欲悔陽生前頓首曰可則立之否則已鮑
牧恐禍起乃復曰皆景公子也何為不可乃與盟立陽
生是為悼公悼公入宮使人遷晏孺子於駘殺之幕下
而逐孺子母芮子芮子故賤而孺子少故無權國人輕
之悼公元年齊伐魯取讎闡初陽生亡在魯季康子以
其妹妻之及歸即位使迎之季姬與季魴侯通言其情

魯弗敢與故齊伐魯竟迎季姬季姬嬖齊復歸魯侵地
鮑子與悼公有郤不善四年吳魯伐齊南方鮑子弑悼
公赴于吳吳王夫差哭於軍門外三日將從海入討齊
齊人敗之吳師乃去晉趙鞅伐齊至賴而去齊人共立
悼公子壬是為簡公簡公四年春初簡公與父陽生俱
在魯也闕止有寵焉及即位使為政田成子憚之驟顧
於朝御鞅言簡公曰田闕不可並也君其擇焉弗聽子
我夕田逆殺人逢之遂捕以入田氏方睦使囚病而遺

守囚者酒醉而殺守者得亡子我盟諸田於陳宗初田
豹欲為子我臣使公孫言豹豹有喪而止後卒以為臣
幸於子我子我謂曰吾盡逐田氏而立女可乎對曰我
遠田氏矣且其違者不過數人何盡逐焉遂告田氏子
行曰彼得君弗先必禍子子行舍於公宮夏五月壬申
成子兄弟四乘如公子我在幄出迎之遂入閉門宦者
禦之子行殺宦者公與婦人飲酒于檀臺成子遷諸寢
公執戈將擊之太史子餘曰非不利也將除害也成子

出舍于庫聞公猶怒將出曰何所無君子行拔劍曰需事之賊也誰非田宗所不殺子者有如田宗乃止子我歸屬徒攻闢與大門皆弗勝乃出田氏追之豐邱人執子我以告殺之郭闢成子將殺大陸子方田逆請而免之以公命取車於道出雍門田豹與之車弗受曰逆為余請豹與余車余有私焉事子我而有私於其讎何以見魯衛之士庚辰田常執簡公于徐州公曰余蚤從御執言不及此甲午田常弑簡公于徐州田常乃立簡公

弟騫是為平公平公即位田常相之專齊之政割齊安平以東為田氏封邑平公八年越滅吳二十五年卒子宣公積立宣公五十一年卒子康公貸立田會反廩邱康公二年韓魏趙始列為諸侯十九年田常曾孫田和始為諸侯遷康公海濱二十六年康公卒呂氏遂絕其祀田氏卒有齊國為齊威王彊於天下

太史公曰吾適齊自泰山屬之琅邪北被于海膏壤二千里其民閭達多匿知其天性也太公之聖建國本

桓公之盛修善政以為諸侯會盟稱伯不亦宜乎洋洋
哉固大國之風也

史記正義卷三十二

欽定四庫全書

史記正義卷三十三

唐 張守節 撰

魯周世家第三

史記三十三

周公旦者周武王弟也自文王在時旦為子孝篤仁異於羣子及武王即位旦常輔翼武王用事居多武王九年東伐至盟津周公輔行十一年伐紂至牧野

衛州即牧野之

地東北去朝歌七十三里

周公佐武王作牧誓破殷入商宮已殺紂

周公把大鉞召公把小鉞以夾武王釁社告紂之罪于天及殷民釋箕子之囚封紂子武庚祿父使管叔蔡叔傳之以續殷祀徧封功臣同姓戚者封周公旦於少昊

之虛曲阜

括地志云兗州曲阜縣外城即魯公伯禽所築也

是為魯公周公不

就封留佐武王武王克殷二年天下未集武王有疾不豫羣臣懼太公召公乃繆卜周公曰未可以戚我先王周公於是乃自以為質設三壇周公北面立戴璧秉圭告於大王王季文王史策祝曰惟爾元孫王發勤勞阻

疾若爾三王是有負子之責於天以旦代王發之身旦
巧能多材多藝能事鬼神乃王發不如旦多材多藝不
能事鬼神乃命于帝庭敷佑四方用能定汝子孫于下
地四方之民罔不敬畏無墜天之降葆命我先王亦永
有所依歸

墜直
類反

今我其即命於元龜爾之許我我以其

璧與圭歸以俟爾命爾不許我我乃屏璧與圭周公已
令史策告大王王季文王欲代武王發於是乃即三王而
卜卜人皆曰吉發書視之信吉周公喜開籥乃見書遇

吉周公入賀武王曰王其無害旦新受命三王維長終
是圖茲道能念予一人周公藏其策金縢匱中誠守者
勿敢言明日武王有瘳其後武王既崩成王少在強葆
之中

強闊八寸長八尺用約小兒於背而負行葆小兒被也

周公恐天下聞武王

崩而畔周公乃踐阼代成王攝行政當國管叔及其羣
弟流言於國曰周公將不利於成王周公乃告太公望
召公奭曰我之所以弗辟

音避

而攝行政者恐天下畔周

無以告我先王大王王季文王三王之憂勞天下久矣

於今而后成武王蚤終成王少將以成周我所以為之
若此於是卒相成王而使其子伯禽代就封於魯周公
戒伯禽曰我文王之子武王之弟成王之叔父我於天
下亦不賤矣然我一沐三捉髮一飯三吐哺起以待士
猶恐失天下之賢人子之魯慎無以國驕人管蔡武庚
等果率淮夷而反周公乃奉成王命興師東伐作大誥
遂誅管叔殺武庚放蔡叔收殷餘民以封康叔於衛封
微子於宋以奉殷祀寧淮夷東土二年而畢定諸侯咸

服宗周天降祉福唐叔得禾異母同穎獻之成王成王
命唐叔以餽周公於東土作餽禾周公既受命禾嘉天
子命作嘉禾東土以集周公歸報成王乃為詩貽王命
之曰鴟鴞王亦未敢訓周公成王七年二月乙未王朝
步自周至豐使太保召公先之雒相土其三月周公往
營成周雒邑卜居焉曰吉遂國之成王長能聽政於是
周公乃還政於成王成王臨朝周公之代成王治南面
倍依以朝諸侯及七年後還政成王北面就臣位躬躬

如畏然初成王少時病周公乃自揃其蚤沈之河以祝
於神曰王少未有識奸神命者乃旦也亦藏其策於府
成王病有瘳及成王用事人或譖周公周公奔楚成王
發府見周公禱書乃泣反周公周公歸恐成王壯治有
所淫佚乃作多士作毋逸毋逸稱為人父母為業至長
久子孫驕奢忘之以亡其家為人子可不慎乎故昔在
殷王中宗嚴恭敬畏天命自度治民震懼不敢荒寧故
中宗饗國七十五年其在高宗也武丁久勞于外為與小

人作其即位乃有亮闇三年不言言乃讜不敢荒寧密
靖殷國至于小大無怨故高宗饗國五十五年其在祖
甲不義惟王久為小人于外知小人之依能保施小民
不侮鰥寡故祖甲饗國三十三年多士稱曰自湯至于
帝乙無不率祀明德帝無不配天者在今後嗣王紂誕
淫厥佚不顧天及民之從也其民皆可誅周多士文王
日中昃不暇食饗國五十年作此以誠成王成王在豐
天下已安周之官政未次序於是周公作周官官別其

宜作立政以便百姓百姓說周公在豐病將沒曰必葬

我成周以明吾不敢離成王周公既卒成王亦讓葬周

公於畢

括地志云周公墓在雍州咸陽北十二里畢原上

從文王以明予小子

不敢臣周公也周公卒後秋未獲暴風雷雨禾盡偃大

木盡拔周國大恐成王與大夫朝服以開金縢書王乃

得周公所自以為功代武王之說二公及王乃問史百

執事史百執事曰信有昔周公命我勿敢言成

王執書以泣曰自今後其無繆卜乎昔周公勤勞王家

惟予幼人弗及知今天動威以彰周公之德惟朕小子

其迎我國家禮亦宜之

孔安國云周公以成王未寤故留東未還成王改過自新遣使

者逆之亦國家禮有德之宜也王孔二說非也按言成王以聞金縢之書知天風雷以彰周公之德故成王亦設郊天之禮以迎我國家先祖配食之禮亦當宜之故成王出郊天反雨不風也王出郊天乃

雨反風禾盡起二公命國人凡大木所偃盡起而築之

歲則大熟於是成王乃命魯得郊祭文王魯有天子禮

樂者以褒周公之德也周公卒子伯禽固已前受封是

為魯公魯公伯禽之初受封之魯三年而後報政周公

周公曰何遲也伯禽曰變其俗革其禮喪三年然後除之故遲太公亦封於齊五月而報政周公周公曰何疾也曰吾簡其君臣禮從其俗為也及後聞伯禽報政遲乃嘆曰嗚呼魯後世其北面事齊矣夫政不簡不易民不有近平易近民民必歸之伯禽即位之後有管蔡等反也淮夷徐戎亦並興反於是伯禽率師伐之於勝作勝誓曰陳爾甲冑無敢不善無敢傷牯古毒反牯牛馬牢也令臣無傷其牢恐馬逆牛其風臣妾逋逃勿敢越逐敬復之無敢寇

攘踰牆垣魯人三郊三隧峙爾芻茭糧楨幹

糧去九反楨音

真

無敢不逮我甲戌築而征徐我無敢不及有大刑作

此盼誓遂平徐我定魯魯公伯禽卒子考公首立考公

四年卒立弟熙是謂煬公煬公築茅闕門六年卒子幽

公宰立幽公十四年幽公弟潰殺幽公而自立是為魏

公魏公五十年卒子厲公擢立厲公三十七年卒魯人立

其弟具是為獻公獻公三十二年卒子真公濞立真公

十四年周厲王無道出奔彘共和行政二十九年周宣

王即位三十年真公卒弟敖立是為武公武公九年春

武公與長子括少子戲

許義反又音
許宜反後同

西朝周宣王宣王

愛戲欲立戲為魯太子周之樊仲山父諫宣王曰廢長
立少不順不順必犯王命犯王命必誅之故出令不可
不順也令之不行政之不立行而不順民將奔上夫下
事上少事長所以為順今天子建諸侯立其少是教民
逆也若魯從之諸侯效之王命將有所壅若弗從而誅
之是自誅王命也誅之亦失不誅亦失王其圖之宣王

弗聽卒立戲為魯太子夏武公歸而卒戲立是為懿公

懿公九年懿公兄括之子伯御

伯我家反下同也

與魯人攻弑

懿公而立伯御為君伯御即位十一年周宣王伐魯殺

其君伯御而問魯公子能道順

道音導順音訓

諸侯者以為魯

後樊穆仲曰魯懿公弟稱

尺證反

肅恭明神敬事耆老賦

事行刑必問於遺訓而咨於固實不干所問不犯所知

宣王曰然能訓治其民矣乃立稱於夷宮是為孝公自

是後諸侯多畔王命孝公二十五年諸侯畔周犬戎殺

幽王秦始列為諸侯二十七年孝公卒子弗湟立是為
惠公惠公三十年晉人弑其君昭侯四十五年晉人又
弑其君孝侯四十六年惠公卒長庶子息攝當國行君
事是為隱公初惠公適夫人無子適音的公賤妾聲子生
子息息長為娶於宋宋女至而好惠公奪而自妻之生
子允登宋女為夫人以允為太子及惠公卒為允少故
魯人共令息攝政不言即位隱公五年觀漁於棠八年
與鄭易天子之太山之邑祊及許田君子譏之十一年

冬公子揮諂謂隱公曰百姓便君君其遂立吾請為君
殺子允君以我為相隱公曰有先君命吾為允少故攝
代今允長矣吾方營菟裘之地而老焉以授子允政揮
懼子允聞而反誅之乃反譖隱公於子允曰隱公欲遂
立去子子其圖之請為子殺隱公子允許諾十一月隱
公祭鍾巫齊于社圃館于蒍氏揮使人弑隱公于蒍氏
而立子允為君是為桓公桓公元年鄭以璧易天子之
許田二年以宋之賂鼎入於太廟君子譏之三年使揮

迎婦于齊為夫人六年夫人生子與桓公同日故名曰
同同長為太子十六年會于曹伐鄭入厲公十八年春
公將有行遂與夫人如齊申繻諫止公不聽遂如齊齊
襄公通桓公夫人公怒夫人夫人以告齊侯夏四月丙
子齊襄公饗公公醉使公子彭生抱魯桓公因命彭生
摺其脅公死于車魯人告于齊曰寡君畏君之威不敢
寧居來修好禮禮成而不反無所歸咎請得彭生以除
醜於諸侯齊人殺彭生以說魯立太子同是為莊公莊

公母夫人因留齊不敢歸魯莊公五年冬伐衛內衛惠公八年齊公子糾來奔九年魯欲內子糾於齊後桓公桓公發兵擊魯魯急殺子糾召忽死齊告魯生致管仲

魯人施伯曰

世本云施伯魯惠公孫

齊欲得管仲非殺之也將用

之用之則為魯患不如殺以其屍與之莊公不聽遂囚管仲與齊齊人相管仲十三年魯莊公與曹沫會齊桓公於柯曹沫刦齊桓公求魯侵地已盟而釋桓公桓公欲背約管仲諫卒歸魯侵地十五年齊桓公始霸二十

三年莊公如齊觀社三十二年初莊公築臺臨黨氏見

孟女說而愛之許立為夫人割臂以盟孟女生子斑斑

長說梁氏女往觀園人輦自牆外與梁氏女戲

輦力角反斑

怒鞭輦莊公聞之曰輦有力焉遂殺之是未可鞭而置

也斑未得殺會莊公有疾莊公有三弟長曰慶父次曰

叔牙次曰季友莊公取齊女為夫人曰哀姜哀姜無子

哀姜娣

田庚反

曰叔姜生子開莊公無適嗣愛孟女欲立

其子斑莊公病而問嗣於弟叔牙叔牙曰一繼一及魯

之常也慶公在可為嗣君何憂莊公患叔牙欲立慶父
退而問季友季友曰請以死立斑也莊公曰曩者叔牙
欲立慶父奈何季友以莊公命命牙待於鍼巫氏使鍼
季刳飲叔牙以鴆曰飲此則有後奉祀不然死且無後
牙遂飲鴆而死魯立其子為叔孫氏八月癸亥莊公卒
季友竟立子斑為君如莊公命侍喪舍于黨氏未至公宮止於
舅氏先時慶父與哀姜私通欲立哀姜嫡子開及莊公卒
而季友立斑十月己未慶父使圉人犛殺魯公子斑於

黨氏季友犇陳慶父竟立莊公子開是為湣公湣公二
年慶父與哀姜通益甚哀姜與慶父謀殺湣公而立慶父
慶父使卜嚭襲殺湣公於武闈

嚭魚綺反
闈音韋

季友聞之自

陳與湣公弟申如邾請魯求內之魯人欲誅慶父慶父
恐奔莒於是季友奉子申入立之是為釐公釐公亦莊
公少子哀姜恐奔邾季友以賂如莒求慶父慶父歸使
人殺慶父慶父請奔弗聽乃使大夫奚斯行哭而往慶
父聞奚斯音乃自殺齊桓公聞哀姜與慶父亂以危魯

乃召之邾而殺之以其屍歸戮之魯魯釐公請而葬之季友母陳女故亡在陳陳故佐送季友及子申季友之將生也父魯桓公使人卜之曰男也其名曰友間于兩社為公室輔季友亡則魯不昌及生有文在掌曰友遂以名之號為成季其後為季氏慶父後為孟氏也釐公元年以汶陽鄆封季友季友為相九年晉里克殺其君奚齊卓子齊桓公率釐公討晉亂至高梁而還立晉惠公十七年齊桓公卒二十四年晉文即位三十三年釐

公卒子興立是為文公元年楚太子商臣弑其父
成王代立三年文公朝晉襄公十一年十月甲午魯敗
翟于鹹獲長翟橋如富父終甥春其喉以戈殺之埋其
首於子駒之門以命宣伯初宋武公之世鄭瞞伐宋

鄭作

度音所劉反
瞞莫寒反

司徒皇父帥師禦之以敗翟于長丘獲長

翟緣斯晉之滅路獲喬如弟焚如齊惠公二年鄭瞞伐
齊齊王子城父獲其弟榮如埋其首於北門衛人獲其
季弟簡如鄭瞞由是遂亡十五年季文子使於晉十八

年二月文公卒文公有二妃長妃齊女哀姜生子惡及
視次妃敬嬴嬖愛生子倭倭私事襄仲襄仲欲立之叔
仲曰不可襄仲請齊惠公惠公新立欲親魯許之冬十
月襄仲殺子惡及視而立倭是為宣公哀姜歸齊哭而
過市曰天乎襄仲為不道殺適音的立庶市人皆哭魯人
謂之哀姜魯由此公室卑三桓彊宣公倭十二年楚莊
王彊圍鄭鄭伯降復國之十八年宣公卒子成公黑肱
立是為成公季文子曰使我殺適立庶失大援者襄仲

襄仲立宣公公孫歸父有寵宣公欲去三桓與晉謀伐
三桓會宣公卒季文子怨之歸父奔齊成公二年春齊
伐取我隆夏公與晉卻克敗齊頃公於鞞齊復歸我侵
地四年成公如晉晉景公不敬魯魯欲背晉合於楚或
諫乃不十年成公如晉晉景公卒因留成公送葬魯諱
之十五年始與吳王壽夢會鍾離
括地志云鍾離國故城在濠州鍾離縣東
五十六年宣伯告晉欲誅季文子文子有義晉人弗許
十八年成公卒子午立是為襄公是時襄公三歲也襄

公元年晉立悼公往年冬晉欒書弑其君厲公四年襄
公朝晉五年季文子卒家無衣帛之妾廐無食粟之馬
府無金玉以相三君君子曰季文子廉忠矣九年與晉
伐鄭晉悼公冠襄公於衛季武子從相行禮十一年三
桓氏分為三軍十二年朝晉十六年晉平公即位二十
一年朝晉平公二十二年孔丘生

生在周靈王二十一年魯襄二十二年晉

平七年吳諸樊十年

二十五年齊崔杼弑其君莊公立其弟景公

二十九年吳延陵季子使魯問周樂盡知其意魯人敬

馬三十一年六月襄公卒其九月太子卒魯人立齊歸之子稠為君是為昭公昭公年十九猶有童心穆叔不欲立曰太子死有母弟可立不即立長年鈞擇賢義鈞則卜之今稠非適嗣且又居喪意不在戚而有喜色若果立必為季氏憂季武子弗聽卒立之比及葬三易袞君子曰是不終也昭公三年朝晉至河晉平公謝還之魯耻焉四年楚靈王會諸侯於申昭公稱病不往七年季武子卒八年楚靈王就章華臺召昭公昭公往賀賜

昭公寶器已而悔復詐取之十二年朝晉至河晉平公
謝還之十三年楚公子棄疾弑其君靈王伐立十五年朝
晉晉留之葬晉昭公魯耻之二十年齊景公與晏子將
竟因入魯問禮二十一年朝晉至河晉謝還之二十五
年春鸛鵒來巢師已曰文成之世童謠曰鸛鵒來巢公
在乾侯鸛鵒入處公在外野季氏與郈氏聞鸛鵒季氏芥
鷄羽郈氏金距季平子怒而侵郈氏郈昭伯亦怒平子
臧昭伯之弟會偽讒臧氏匿季氏臧昭伯囚季氏人季

平子怒因臧氏老臧邠氏以難告昭公昭公九月戊戌
伐季氏遂入平子登臺請曰君以讒不察臣罪誅之請
遷沂上弗許請囚於鄭弗許請以五乘亡弗許子家駒
曰君其許之政自季氏久矣為徒者衆衆將合謀弗聽
邠氏曰必殺之叔孫氏之臣辰謂其衆曰無季氏與有
孰利皆曰無季氏是無叔孫氏廢曰然救季氏遂敗公
師孟懿子聞叔孫氏勝亦殺邠昭伯邠昭伯為公使故
孟氏得之三家共伐公公遂奔己亥公至于齊齊景公

曰請致千社待君子家曰弃周公之業而臣於齊可乎
乃止子家曰齊景公無信不如早之晉弗從叔孫見公
還見平子平子頓首初欲迎昭公孟孫季孫後悔乃止
二十六年春齊伐魯取鄆而居昭公焉夏齊景公將內
公令無受魯賂申豐汝賈許齊臣高齏子將粟五千庾
子將言於齊侯曰羣臣不能事魯君有異焉宋元公為
魯如晉求內之道卒叔孫昭子求內其君無病而死不
知天弃魯乎抑魯君有罪于鬼神也願君且待齊景公

從之二十八年昭公如晉求入季平子私於晉六卿六卿受季氏賂諫晉君晉君乃止居昭公乾侯二十九年昭公如鄆齊景公使人賜昭公書自謂主君昭公耻之怒而去乾侯三十一年晉欲內昭公名季平子平子布衣跣行因六卿謝罪六卿為言曰晉欲內昭公衆不從晉人止三十二年昭公卒於乾侯魯人共立昭公弟宋為君是為定公立趙簡子問史墨曰季氏亡乎史墨對曰不亡季友有大功於魯受鄆為上卿至于武子

文子世增其業魯文公卒東門遂殺適立庶魯君於是
失國政政在季氏於今四君矣民不知君何以得國是
以為君慎器與名不可以假人定公五年季平子卒陽
虎私怒囚季桓子與盟乃捨之七年齊伐我取鄆以為
魯陽虎邑以從政八年陽虎欲盡殺三桓適而更立其
所善庶子以代之載季桓子將殺之桓子詐而得脫三
桓共攻陽虎陽虎居陽關九年魯伐陽虎陽虎奔齊已
而奔晉趙氏

左傳云仲尼曰趙氏其世有亂乎杜預云受亂人故

十年定公與齊

景公會於夾谷孔子行相事齊欲襲魯君孔子以禮厯階誅齊淫樂齊侯懼乃止歸魯侵地而謝過十二年使仲由毀三桓城收其甲兵孟氏不肯墮城伐之不克而止季桓子受齊女樂孔子去十五年定公卒子將立是為哀公哀公五年齊景公卒六年齊田乞弑其君孺子七年吳王夫差彊伐齊至繒徵百牢於魯季康子使子貢說吳王及太宰嚭以禮誑之吳王曰我文身不足責禮乃止八年吳為鄆伐魯至城下盟而去齊伐我取

三邑十年伐齊南邊十二年齊伐魯季氏用冉有有功
思孔子孔子自衛歸魯十四年齊田常弑其君簡公於
徐州孔子請伐之哀公不聽十五年使子服景伯子貢
為介適齊齊歸我侵地田常初相欲親諸侯十六年孔
子卒二十二年越王勾踐滅吳王夫差二十七年春季
康子卒夏哀公患三桓將欲因諸侯以刳之三桓亦患
公作難故君臣多間公游於陵阪遇孟武伯於衢曰請
問余及死乎對曰不知也公欲以越伐三桓八月哀公

如陘氏三桓攻公公奔于衛去如鄒遂如越國人迎哀
公復歸卒于有山氏子寧立是為悼公悼公之時三桓
勝魯如小侯畀於三桓之家十三年三晉滅智伯分其
地有之三十七年悼公卒子嘉立是為元公元公二十
一年卒子顯立是為穆公穆公三十三年卒子奮立是
為共公共公二十二年卒子屯立是為康公康公九年
卒子匱立是為景公景公二十九年卒子叔立是為平
公是時六國皆稱王平公十二年秦惠王卒二十二年

平公卒子賈立是為文公文公七年楚懷王死于秦二十三年文公卒子雝立是為頃公頃公二年秦拔楚之郢楚頃王東徙于陳十九年楚伐我取徐州二十四年楚考烈王伐滅魯頃公亡遷於下邑為家人魯絕祀頃公卒于柯魯起周公至頃公凡三十四世

太史公曰余聞孔子稱曰甚矣魯道之衰也洙泗之間斷斷如也觀慶父及叔牙閔公之際何其亂也隱桓之事襄仲殺適立廢三家北面為臣親攻昭公昭公以奔

至其揖讓之禮則從矣而行事何其虔也

史記正義卷三十三

欽定四庫全書

史記正義卷三十四

唐 張守節 撰

燕召公世家第四

史記三十四

召公奭與周同姓姓姬氏周武王之滅紂封召公於北燕其在成王時召公為三公自陝以西召公主之自陝以東周公主之成王既幼周公攝政當國踐祚召公疑之作君奭君奭不說周公周公乃稱湯時有伊尹假于

皇天在太戊時有若伊陟臣扈假于上帝巫咸治王

家在祖乙時則有若巫賢在武丁時則有若甘般率維

茲有陳保又有殷於是召公乃說召公之治西方甚得

兆民和召公巡行鄉邑有棠樹

今之棠梨樹也括地志云邵伯廟在洛州壽安

縣西北五里邵伯聽訟甘棠之下周人思之不伐其樹後人懷其德因立廟有棠在九曲城東阜上決獄

政事其下自侯伯至庶人各得其所無失職者召公卒

而民人思召公之政懷棠樹不敢伐哥詠之作甘棠之

詩自召公已下九世至惠侯燕惠侯當周厲王奔彘共

和之時惠侯卒子釐侯立

釐音信

是歲周宣王初即位釐

侯二十一年鄭桓公初封於鄭三十六年釐侯卒子頃

侯立頃侯二十年周幽王淫亂為犬戎所弑秦始皇列為

諸侯二十四年頃侯卒子哀侯立哀侯二年卒子鄭侯

立鄭侯三十六年卒子繆侯立繆侯七年而魯隱公元

年也十八年卒子宣侯立宣侯十三年卒子桓侯立桓

侯七年卒子莊公立莊公十二年齊桓公始霸十六年

與宋衛共伐周惠王惠王出奔溫立惠王弟頹為周王

十七年鄭執燕仲父內惠王于周二十七年山戎來

侵我齊桓公救燕遂北伐山戎而還燕君送齊桓公出

境桓公因割燕所至地予燕

予音與括地志云燕留故城在滄州長蘆縣東北十

七里即齊桓公分濟割燕君所至地與燕因築此城故名燕留

使燕共貢天子如成周

時職使燕復修召公之法三十三年卒子襄公立襄公

二十六年晉文公為踐土之會稱伯三十一年秦師敗

于穀三十七年秦穆公卒四十年襄公卒桓公立桓公

十六年卒宣公立宣公十五年卒昭公立昭公十三年

卒武公立是歲晉滅三卻大夫武公十九年卒文公立
文公六年卒懿公立懿公元年齊崔杼弑其君莊公四
年卒子惠公立惠公元年齊高止來奔六年惠公多寵
姬公欲去諸大夫而立寵姬宋大夫共誅姬宋惠公懼
奔齊四年齊高偃如晉請共伐燕入其君晉平公許與
齊伐燕入惠公惠公至燕而死燕立悼公悼公七年卒
共公立共公五年卒平公立晉公室卑六卿始彊大平
公十八年吳王闔閭破楚入郢十九年卒簡公立簡公

十二年卒獻公立晉趙鞅圍范中行於朝歌獻公十二年齊田常弑其君簡公十四年孔子卒二十八年獻公卒孝公立孝公十二年韓魏趙滅知伯分其地三晉彊十五年孝公卒成公立成公十六年卒湑公立湑公三十一年卒釐公立是歲三晉列為諸侯釐公三十年伐齊敗于林營釐公卒桓公立桓公十一年卒文公立是歲秦獻公卒秦益彊文王十九年齊威王卒二十八年蘇秦始來見說文公文公予車馬金帛以至趙趙肅侯

用之因約六國為從長

從兄從反
長丁丈反

秦惠王以其女為燕

太子婦二十九年文公卒太子立是為易王易王初立

齊宣王因燕喪伐我取十城蘇秦說齊使復歸燕十城

十年燕君為王蘇秦與燕文公夫人私通懼誅乃說王

使齊為反間欲以亂齊

使音所吏反
間音紀覓反

易王立十二年卒

子燕噲立燕噲既立齊人殺蘇秦蘇秦之在燕與其相

子之為婚而蘇代與子之交及蘇秦死而齊宣王復用

蘇代燕噲三年與楚三晉攻秦不勝而還子之相燕貴

重主斷蘇代為齊使於燕燕王問曰齊王奚如對曰必
不霸燕王曰何也對曰不信其臣蘇代欲以激燕王以
尊子之也於是燕王大信子之子之因遺蘇代百金而

聽

瓚云秦以一溢為一金
孟康云二十四兩曰溢

其所使鹿毛壽謂燕王不如

以國讓相子之人之謂堯賢者以其讓天下於許由許
由不受有讓天下之名而實不失天下今王以國讓於
子之子之必不敢受是王與堯同行也燕王因屬國於
子之子之大重或曰禹薦益已而以啟人為吏及老而

以啟人為不足任乎天下傳之於益已而啟與交黨攻
益奪之天下謂禹名傳天下於益已而實令啟自取之
今王言屬國於子之而吏無非太子人者是名屬子之
而實太子用事也王因收印自三百石吏已上而效之
子之子之南面行王事而噲老不聽政顧為臣國事皆
決於子之三年國大亂百姓恫怨將軍市被人也與太
子平謀將攻子之諸將謂齊湣王曰因而赴之破燕必
矣齊王因令人謂燕太子平曰寡人聞太子之義將廢

私而立公飭君臣之義

勸音勸

明父子之位寡人之國小

不足以為先後

先後並去聲

雖然則唯太子所以令之太子

因要黨聚衆將軍市被圍公宮攻子之不克將軍市被
及百姓反攻太子平將軍市被死以徇因構難數月死
者數萬衆人恟恐百姓離志孟軻謂齊王曰今伐燕此
文武之時不可失也王因令章子將五都之兵以因北
地之衆以伐燕士卒不戰城門不閉燕君噲死齊大勝
燕子之亡二年而燕人共立太子平是為燕昭王燕昭

王於破燕之後即位卑身厚幣以招賢者謂郭隗曰齊
因孤之國亂而襲破燕孤極知燕小力少不足以報然
誠得賢士以共國以雪先王之耻孤之願也先生視可
者得身事之郭隗曰王必欲致士先從隗始況賢於隗
者豈遠千里哉於是昭王為隗改築宮而師事之樂毅
自魏往鄒衍自齊往劇辛自趙往士爭趨燕燕王吊死
問孤與百姓同甘苦二十八年燕國殷富士卒樂軼輕
戰於是遂以樂毅為上將軍與秦楚三晉合謀以伐齊

齊兵敗湣王出亡於外燕兵獨追北入至臨淄盡取齊
寶燒其宮室宗廟齊城之不下者獨唯聊莒即墨其餘
皆屬燕六歲昭王三十三年卒子惠王立惠王為太子
時與樂毅有隙及即位疑毅使騎劫代將樂毅亡走趙
齊田單以即墨擊敗燕軍騎劫死燕兵引歸齊悉復得
其故城湣王死于莒乃立其子為襄王惠王七年卒韓
魏楚共伐燕燕武成王立武成王七年齊田單伐我拔
中陽十三年秦敗趙於長平四十餘萬十四年武成王

卒子孝王立孝王元年秦圍邯鄲者解去三年卒子今

王喜立今王喜四年秦昭王卒燕王命相栗腹約歡趙

以五百金為趙王酒還報燕王曰趙王壯者皆死長平

其孤未壯可伐也王召昌國君樂間問之對曰趙四戰

之國趙東隣燕西接秦境南錯韓魏北連胡其民習兵不可伐王曰

吾以五而伐一對曰不可燕王怒羣臣皆以為可卒起

二軍車二千乘栗腹將而攻鄣鄉秦攻代今代州也戰國策云廉頗


以二十萬過栗腹於鄣樂乘以五萬唯獨大夫將渠謂

燕王曰與人通關約交以五百金飲人之王使者報而
反攻之不祥兵無成功燕王不聽自將偏軍隨之將渠
引燕王綏止之曰王必無自往往無成功王薨之以足
將渠泣曰臣非以自為為王也燕君至宋子趙使廉頗
將擊破栗腹於鄢破卿秦樂乘於代樂間奔趙廉頗逐
之五百餘里圍其國燕人請和趙人不許必令將渠處
和燕相將渠以處和趙聽將渠解燕圍六年秦滅東西
周置三川郡七年秦拔趙榆次三十七城秦置太原郡

九年秦王政初即位十年趙使廉頗將攻繁陽拔之趙
孝成王卒悼襄王立使樂乘代廉頗廉頗不聽攻樂乘
樂乘走廉頗奔大梁十二年趙使李牧攻燕拔武遂方
城劇辛故居趙與龐煖善已而亡走燕燕見趙數困于
秦而廉頗去令龐煖將也欲因趙弊攻之問劇辛辛曰
龐煖易與耳燕使劇辛將擊趙趙使龐煖擊之取燕軍
二萬殺劇辛秦拔魏二十城置東郡十九年秦拔趙之
鄴即相州
鄴縣也九城趙悼襄王卒二十三年太子丹質於秦

亡歸燕二十五年秦虜滅韓王安置潁川郡二十七年
秦虜趙王遷滅趙趙公子嘉自立為代王燕見秦且滅
六國秦兵臨易水禍且至燕太子丹陰養壯士二十人
使荆軻獻督元地圖於秦因襲刺秦王秦王覺殺軻使
將軍王翦擊燕一十九年秦攻拔我薊燕王亡徙居遼
東斬丹以獻秦三十年秦滅魏三十三年秦拔遼東虜
燕王喜卒滅燕是歲秦將王翦音奔亦虜代王嘉
太史公曰召公奭可謂仁矣甘棠且思之況其人乎燕

北迫蠻貉內措齊晉崎嶇疆國之間最為弱小幾滅者
數矣然社稷血食者八九百歲於姬姓獨後亡豈非公
之烈耶



史記正義卷三十四